

■ TRIBUNA POLITICA

Per il giubileum da 100 onns da la Pro Senectute

DA CHRISTIAN RATHGEB,
CUSSEGLIER GUVERNATIV

Sut il patrunadi da la Societad svizra d'utilitad publica han fundà 10 umens avant in tschientaner la fundaziun «per la vegliadetgna», e quai per megliorar la situaziun da la gronda part da las personas basegnusas en Svizra. Pro Senectute po pia festivar quest onn ses giubileum da 100 onns.

Tenor il document da fundaziun ha Pro Senectute dal Grischun l'intent da mantegnair e da promover il bainstar da las personas pli veglias. Quai ademplescha ella oz cun passa 20 collavuraturas e collavuratur, cun 500 emploiadas ed emploiads a temp parzial, cun collavuraturas e collavuratur en uffizi d'onur e cun voluntarias e voluntaris.

Pro Senectute sa caracterisescha sezza – ord mia vista cun raschun – sco «organisaziun professiunala directiva d'agid e da servetschs per personas pli veglias en il chantun Grischun».

Oz na stat betg pli en il center da l'activitad da la Pro Senectute la povradad finanziaria da la populaziun pli veglia, mabain pli e pli la mancanza da contacts e da relaziuns socialas sco er la finamira da



mantegnair e promover la fitness corporala e spiertala. Ultra da la cussegliaziun sociala ed ultra da l'agid finanziel giuda perquai er la vasta purschida da curs e d'activitads da temp liber da la Pro Senectute in'auto stima. D'aggiuntar èn differents servetschs e differents purschidas da sustegn che gidan las personas pli veglias a concepir ed a dumagnar lur tegnairechasa. Uschia contribuescha Pro Senectute en moda decisiva a cuntanscher las finamiras dal model directiv pertutgant la vegliadetgna dal Grischun ch'il chantun ha relaschà.

En il model directiv pertutgant la vegliadetgna ha la regenza formulà per il champ d'acziun «promozion da la sanadad e prevenziun» la suandanta finamira strategica: Rinforzar l'autonomia, la sanadad e la qualitad da viver dals umans pli vegls per augmentar il dumber dals onns da vita sauns e

per retardar l'entrada en ina chasa da tgira.

Per cuntanscher questa finamira pretensiusa e per francar persistentamain la promoziun da la sanadad e la prevenziun en las vischnancas ed en las regiuns tgira l'uffizi da sanadad ina collavuraziun intensiva cun la Pro Senectute dal Grischun, e quai dapi il cumenzament dal program chantunal «promozion da la sanadad e prevenziun en la vegliadetgna».

Jau engraziels cordialmain al cussegl da fundaziun e tut las collavuraturas ed ils collavuratur sco er tut las voluntarias ed ils voluntaris ch'èn engaschads en la Pro Senectute – ch'els sa chattian en las vischnancas, en las regiuns ed en il secretariat a Curia – per lur sforzs a favur dals dretgs, dal bainstar, da la dignitad e da la qualitad da viver da las personas pli veglias en il chantun Grischun e per la defensiun dals interess da questa gruppa da la populaziun.

Gugent sper jau che las festivitads a chascun dal giubileum da 100 onns gidian a consolidar ed a rinforzar la stima da la populaziun per l'operar prezios da la Pro Senectute dal Grischun. Jau ma legrel vivnavant d'ina buna collavuraziun.